

Izjava OHR-a na konferenciji za medije međunarodnih organizacija u Mostaru

Komentar OHR-a o napretku u okviru policijske reforme

S obzirom na izvještaje koje su danas objavili različiti dnevni listovi, potrebno je naglasiti da međunarodna zajednica ima jasan stav u pogledu policijske reforme i svojih očekivanja vezanih za ovu reformu.

Upravni odbor Vijeća za implementaciju mira je 20. oktobra pozvao političke lidere da odmah postignu napredak u aktivnostima na restrukturiranju policije i da ne čekaju na formiranje vlasti i parlamenata, kao i da putem konstruktivnog dijaloga omoguće rad Direkcije za reformu policije te osiguraju da prijedlozi koje izradi Direkcija budu usvojeni na nivou državnih i entitetskih vlada i parlamenata.

Vijeće za opće poslove Evropske unije je nekoliko dana prije sjednice Upravnog odbora, odnosno 17. oktobra, izrazilo «svoju posebnu zabrinutost zbog nepostizanja napretka u implementaciji sporazuma o restrukturiranju policije iz oktobra 2005. godine i istaklo kako očekuje da će ova prepreka biti vrlo brzo uklonjena.»

Jasno je da se policijska reforma mora odvijati u skladu s principima Evropske komisije i očigledno je da Vijeće za implementaciju mira i Evropska unija vrlo pažljivo prate postizanje napretka u okviru ove reforme. Ove institucije posvećuju posebnu pažnju reformi policije, s obzirom na značaj koji ova reforma ima za zaključivanje Sporazuma o stabilizaciji i pridruživanju.

Nema mjesta pesimizmu koji je prisutan u nekim novinarskim izvještajima. Postoje naznake da će nakon nekoliko mjeseci

napornog rada ovaj proces biti uspješno okončan, s obzirom da Direkcija za reformu policije postiže odgovarajući napredak u okviru svojih aktivnosti na izradi izvještaja. Započeti su politički razgovori kako bi se pomoglo u finaliziranju ove reforme. Ovi razgovori su izuzetno dobrodošli, posebno ukoliko se na taj način pomogne Direkciji da bude uspješna u izvršavanju svog zadatka.